

# Kupang di Port Dickson masih tak selamat dimakan

BH 16/04/24 mls 21

**Port Dickson:** Kupang di Port Dickson masih tidak selamat untuk dimakan dan larangan penjualannya kepada pengusaha atau nelayan masih diteruskan.

Pengarah Perikanan Negeri Sembilan, Kasim Tawe, berkata hasil analisis sampel kedua kupang dan air diambil daripada perairan Port Dickson oleh makmal Pusat Biosekuriti Perikanan Kuala Lumpur masih mengesan biotoksin melebihi kadar had pengambilan yang selamat.

"Kami perlukan tiga ujian untuk mengenal pasti sama ada nak teruskan atau batalkan larangan mengambil serta menjual kupang dari lokasi terbabit.

"Sampel ketiga sudah diambil hari ini (semalam) dan dijangka Jumaat ini untuk keputusannya.

"Jadi, buat masa ini kupang di kawasan itu masih tidak selamat untuk dimakan dan larangan penjualannya kepada pengusaha atau nelayan masih terpakai sehingga kini," katanya ketika dihubungi semalam.

Beliau berkata kadar biotoksin yang dikesan



*Kupang yang terdapat di perairan Pasir Panjang.*

(Foto Azrul Edham Mohd Aminuddin/BH)

dalam sampel kedua lebih rendah berbanding sampel pertama namun ia masih belum mencapai kadar selamat untuk manusia iaitu 800 per bilion (ppb).

Menurut beliau, kehadiran biotoksin di perairan terbabit juga berlaku secara semula jadi dan berkeungkinan dipercepatkan oleh perubahan cuaca atau kandungan nutrien air laut di perairan itu.

Pada 4 April lalu, Timbalan Ketua Pengarah (Pengurusan) Perikanan Wan

Aznan Abdullah dilaporkan berkata hasil analisis makmal Pusat Biosekuriti Perikanan Kuala Lumpur mendapati terdapat alga berbahaya yang menyebabkan kupang di perairan Port Dickson dicemari dan tidak selamat dimakan.

Beliau berkata sampel air dan kupang di perairan tersebut dicemari biotoksin serta alga spesies *Prorocentrum*, *Alexandrium* dan *Pseudonitzschia* berbahaya dan tidak selamat untuk dimakan.